

**BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
J.U. Zaštićeni pejzaž “Konjuh”  
BANOVICI  
UPRAVNI ODBOR**



Broj: \_\_\_\_\_/14  
Datum, \_\_\_\_\_ 2014. god.

Na osnovu člana 22. stav 1. Zakona o proglašenju dijela područja planine Konjuh, Zaštićenim pejzažom KONJUH, (“Sl. novine TK” br.13/09), člana 15. i 18. Zakona o osnivanju JU Zaštićeni pejzaž “Konjuh” Banovići (“Sl. Novine TK”, broj 6/11), te članova 26. i 34. Pravila JU, **Upravni odbor JU**, na prijedlog **direktora**, na \_\_\_\_\_ redovnoj sjednici održanoj dana \_\_\_\_\_ 2014. godine, **donosi** :

**GODIŠNJI PLAN I PROGRAM RADA  
JU ZAŠTIĆENI PEJZAŽ “KONJUH”**

**NA ZAŠTITI, OČUVANJU, UNAPREĐENJU, PROMOCIJI I KORIŠTENJU  
ZAŠTIĆENOG PEJZAŽA KONJUH ZA 2014. GODINU**

**NACRT**

Banovići , januar 2014.

## I UVOD:

Dobro očuvana priroda prvenstven je interes svakog društva, a briga o njoj je prioritetan zadatak i predmet odgovornosti cijele zajednice.

Područje planine Konjuh je izuzetno vrijednog prirodnog i kulturno historijskog nasljeđa, prostor sa vrlo vrijednom estetikom pejzažnih, ekoloških i kulturnih vrijednosti, prirodnih raznolikosti i bogastva živog i neživog svijeta, zbog čega je 2009.godine, područje Zakonom proglašeno Zaštićenim pejzažom KONJUH, sa ciljem njegove trajne zaštite, očuvanja i unapređenja sa uravnoteženim korištenjem i održivim upravljanjem.

Prirodne vrijednosti područja ZP KONJUH, biološka raznolikost, ne narušeni izvorni karakter pojedinih ekosistema visokovrijednih pejzažnih osobina, kao i historijsko nasljeđe područja, povjerni su na upravljanje Javnoj ustanovi Zaštićeni pejzaž „Konjuh“, Zakonom o njenom osnivanju 2011.godine.

Javnu ustanovu osnovala je Skupština Tuzlanskog kantona, Zakonom o osnivanju, koja je počela sa radom početkom 2012. god.

Zadaća Ustanove je da obavlja djelatnost upravljanja Zaštićenim pejzažom KONJUH u skladu sa Zakonom, odnosno da vodi aktivnu brigu o svim njegovim vrijednostima u cilju zaštite i očuvanja izvornosti prirode, osiguravanja neometanog odvijanja prirodnih procesa i održivog i unaprijeđenog načina korištenja prirodnih dobara, da nadzire sprovođenje svih dozvoljenih djelatnosti u prostoru zaštite i kontroliše ispunjavanje uslova i mjera zaštite prirode i insistira za njihovo provođenje na cijelom području.

Površina Zaštićenog pejzaža je 8139,7 hektara, pretežno šumskog područja i nalazi se na području tri općine, Banovići, Kladanj i Živinice.

Zakonom o proglašenju ZP, područje je razvrstano u tri zone ovisno o stepenu zaštite, što je urađeno na osnovu brojnosti i rasporeda prirodnih vrijednosti područja, te njihovog stanja narušene ravnoteže i ugroženosti.

-Prva zaštićena zona (zona A) obuhvata površinu od 2.411,42 ha u 5 odvojenih površina, i podliježe najstrožijem režimu zaštite.

-Druga zaštićena zona (zona B) je površine od 5.093,70 ha u 4 odvojene površine, sa slobodnijim zaštitnim mjerama.

-Treća zaštićena zona (zona C) sa površinom od 511,49 ha u dvije odvojene površine, zbog svoje ambijentalne vrijednosti namijenjena je prvenstveno za rekreaciju, sport, naučno-nastavni rad i turizam.

Ovim programom Ustanova u toku 2014. godine, planira nastavak dosadašnjih i pokretanje novih aktivnosti, kao što su: Projekata inventarizacije, zaštite, uređenje i promocije vrijednosti ZP KONJUH, projekti izgradnje infrastrukturnih objekata, nabavke stalnih sredstava u službi upravljanja prostorom, intenziviranje stručnih, edukativnih, rekreativno-turističkih i promotivnih aktivnosti, s ciljem kvalitetnijeg rada Ustanove i jačanja njene funkcije upravljanja, čija je misija održivo upravljanje prostorom i prirodnim vrijednostima Zaštićenog pejzaža.

Kroz čitavu 2014. godinu, Ustanova će intenzivno raditi na pripremi različitih projekata radi aplikacija i prijavana javne pozive u zemlji, a i na one finansirane iz međunarodnih fondova, u suradnji sa Ministarstvom prostornog uređenja i zaštite okoliša TK, kao i ostalim zainteresovanim partnerima.

Realizacija planskih aktivnosti utvrđenih ovim Godišnjim programom, biće u direktnoj zavisnosti od organizacionih i materijalno finansijskih kapaciteta, kao i od podrške, razumijevanja i zauzimanja za rad Ustanove svih drugih zaduženih subjekata društva.

## **II POSTOJEĆE STANJE**

### **1. STANJE PROSTORA ZAŠTIĆENOG PEJZAŽA “KONJUH”**

Od proglašenja Zaštićenog pejzaža KONJUH, do danas, izvršeni su određeni radovi uređenja prostora područja, kroz različite projekte i to:

#### **1.1. Uređenje granica prostora Zaštićenog pejzaža**

U prostoru ZP do sada su izvršeni sledeći radovi :

- obilježavanje granica područja, vanjskih granica i zona zaštite,
- postavljanje tabli sa kartom područja, na ulaznim mjestima u dijelove pejzaža, sliva Oskove, na lokalitetu Grab potoka i naselja Brateljevići u dio sliva Drinjače.
- izgrađena ulazna kapija u dio sliva Oskove na lokalitetu Zelenika.
- izrađen info punkt sa objektom suvenirnice i biljetarnice na lokalitetu Zlaća.

#### **1.2. Realizovani projekti**

##### **1.2.1. Projekat “Izgradnja i uređenje izletišta Zlaća”**

Ustanova je sredinom 2012. godine izradila Izvedbeni projekat “Izgradnja i uređenje izletišta Zlaća”, koji je apliciran na Javni poziv Strategija zaštite okoliša za 2012. godinu “Lokalne inicijative za zaštitu biodiverziteta u zaštićenim područjima” u F BiH. Projekat je realizovan u toku 2013. godine.

Realizacija projekta izvršena je kroz tri cijeline, čime se lokalitet izletišta Zlaća sa izgrađenim i postojećim sadržajima, od livade Zelenika do izletišta Zobik, objedinio u jednu izletničko rekreativnu cjelinu, površine od oko 100 ha u dužini od 6000 metara.

Realizacijom projekta urađeno je:

1. Uređenje izletišta “Zelenika”, uređenje zapuštenih površina prije hotela Zlaća sa izgradnjom izletničkih objekata i sadržajai potrebne prateće infrastrukture.
2. Izgradnja rekreativno-poučne staze Mačkovac, od vile Sensi do Batala, lijeva strana rijeke Oskove, sa objektima i infra strukturom.
3. Rekonstrukcija puta za Zobik, dionica Batalo-Zobik.

##### **1.2.2. Realizacija projekta Adrenalinski park “Zlaća”**

JU je u 2013. godini u saradnji sa Udruženjem građana “FUTURIST” Tuzla, pokrenula realizaciju projekta “Adrenalinski park ZLAĆA”, za koji su obezbjeđena sredstava od strane Federalnog fonda.

Projekat je realizovan u obimu od 80 % planiranih poslova. Realizacijom projekta, objekat će biti predat u vlasništvo JU.

Plan nam je sve poslove završiti u 2014. godini i objekat privesti namjeni.

#### **1.3. Stanje korištenja vrijednosti ZP „Konjuh“**

Trenutno korišćenje vrijednosti ZP se odvijaju u okviru rekreativnih, turističkih i vjerskih posjeta, ugostiteljskih djelatnosti, korištenja vodenih potencijala i korištenja prirodnih resursa uz uvažavanje ograničenja po zonama zaštite prostora.

Korištenje prostora ZP od strane lokalnog stanovništva karakterišu navike, koje su nastale kao rezultat višegodišnjih zadovoljavanja potreba u snabdijevanju ogrevnim drvetom, ispaši

stoke, sakupljanju šumskih proizvoda, ljekovitog bilja, lova, ribolova, izuzimanje šljunka, kamena i drugih vrijednosti, koji su korišteni uglavnom bez nekog naročitog nadzora.

## 2. STANJE U JAVNOJ USTANOVI

Javna ustanova Zaštićeni pejzaž "Konjuh" Banovići, osnovana je aprila 2011. godine, Zakonom o osnivanju Javne ustanove, a poslovi registracije kod nadležnog Suda završeni 22.11.2011. godine.

Ustanova je otpočela je sa radom početkom 2012. god.

### 2.1. Organizaciona struktura JU


Javnom ustanovom upravlja Upravni odbor od 3 člana, koji je imenovala Skupština TK.

Ustanova ima ukupno zaposlenih 9 djelatnika i to:

- Direktor (VSS)
- Pomoćnik direktora za ekonomske, pravne i opšte poslove (VSS – 1 izvršioc),
- Pomoćnik direktora za upravljanje zaštićenim pejzažom (VSS - 1 izvršioc),
- Nadzornik u zaštićenom pejzažu (SSS – 5 izvršioaca) i
- Referent za administrativno tehničke poslove (SSS – 1 izvršioc).

Popuna radnih mjesta u skladu sa Pravilnikom o sistematizaciji radnih mjesta, izvršena je krajem 2013. i početkom 2014.godine.

Po Pravilniku o unutarnjoj organizaciji i sistematizaciji radnih mjesta JU, organizaciona šema izgleda ovako:



### 2.3. Materijalni resursi

#### 2.3.1. Uređenje poslovnih prostorija JU

Javna ustanova Zaštićeni pejzaž "Konjuh", nema stalnih sredstava u vidu zgrada i većih poslovnih objekata, čija nabavka treba da uslijedi u narednom periodu.

Poslovne prostorije Ustanove, poslovno sjedište, nalaze se u objektu vlasništva općine Banovići, na adresi Grab potok, koji je bio u namjeni, prvo za smještaj izbjeglica, a kasnije za starija lica.

Prostor je uređen u adekvatan i funkcionalan prostor.

Površina poslovnih prostorija je oko 200 m<sup>2</sup>, za šta se opštini Banovići plaća najam po sklopljenom godišnjem Ugovoru o zakupu u iznosu od 300 KM za mjesec.

Prostorije su kvalitetne i funkcionalne za obavljanje djelatnosti.

JU je registrovana kao korisnik komunalnih usluga i električne energije.

JU ima telefonski priključak i internet.

### **2.3.2. Nabavka osnovnih sredstava**

Ustanova je izvršila nabavku kancelarijskog namještaja i manjeg dijela potrebne opreme i inventara.

Nabavka ostalih osnovnih sredstava i opreme planiraju se izvršiti u 2014. godini u skladu sa Planom nabavki za 2014.godinu.

### **2.3.3. Istraženost i baze podataka**

JU nema oformljene vlastite baze podataka, zbog skorašnjeg početka rada.

Potreba korištenja određenih podataka zadovoljava se korištenjem dostupnih podataka, dosad izrađenih u vezi sa prostorom, vrijednostima i namjenom ZP.

## **3. IZRAĐENI DOKUMENTI**

### **3.1. Dokumenti upravljanja prostorom ZP**

Od dokumenata upravljanja prostorom Zaštićenog pejzaža KONJUH, koji su obaveza Ministarstva, 2013. godine donešen je Prostorni plan posebnih obilježja ZP KONJUH.

Ovim dokumentom je utvrđena osnovna organizacija prostora, mjere korištenja, uređenja i zaštite područja s aktivnostima koje imaju prednost, mjere za unaprijeđenje i zaštitu okoline, te obaveza izrade detaljnih planskih dokumenata za uža područja unutar plana područja posebnog obilježja.

JU je dala značajan doprinos u izradi Prostornog plana.

### **3.2. Donešeni podzakonski akti JU**

JU ima donešene sljedeće osnivačke i podzakonske akte:

- Pravila JU,
- Pravilnik o unutarnoj organizaciji i sistematizaciji radnih mjesta JU,
- Pravilnik o Radu JU,
- Pravilnik o platama JU,
- Pravilnik o postupku direktnog sporazuma JU,
- Pravilnik o korištenju motornih vozila JU.
- Pravilnik o izgledu i načinu iskaznice nadzornika u ZP KONJUH.
- Pravilnik o izgledu uniforme nadzornika u ZP.
- Izrađen i usvojen logo - znak JU i određena pravila njegovog korištenja.

### **III PLAN I PROGRAM UPRAVLJANJA ZP U 2014. GODINI**

Sve aktivnosti i zadaci predviđene ovim dokumentom, koji se planiraju provesti i realizovati u 2014. godini, usmjereni su prvenstveno u cilju jačanja kapaciteta i stvaranja potrebne osnove za rad Javne ustanove na upravljanju vrijednostima ZP.

#### **1. DONOŠENJE PLANISKIH DOKUMENATA**

##### **1.1. Izrada i donošenje Plana upravljanja ZP KONJUH**

Aktivnosti za izradu i donošenje Plana upravljanja Zaštićenim pejzažom KONJUH, pokrenute su u 2013. godini i trebale bi biti završene u toku 2014. godine.

Plan upravljanja ZP, donosi Vlada TK za period od deset godina, na prijedlog kantonalnog Ministarstva prostornog uređenja i zaštite okoliša.

Plan upravljanja određuje razvojne smjernice, način izvođenja zaštite, korištenja i upravljanja zaštićenim područjem, te pobliže smjernice za zaštitu i očuvanje prirodnih vrijednosti zaštićenog područja uz uvažavanje potreba lokalnog stanovništva.

Pravna i fizička lica koja obavljaju djelatnosti u zaštićenom području dužna su se pridržavati plana upravljanja.

JU će u 2014. godini aktivno učestvovati u izradi Plana upravljanja Zaštićenim pejzažom KONJUH.

##### **1.2. Izrada i donošenje unutarnjih i podzakonskih akata JU**

U 2014. godini, JU će nastaviti započete aktivnosti na izradi i donošenju potrebnih dokumenata unutarnje i podzakonske regulative, koji su potrebni za ne ometan, potpun i kvalitetan rad JU na poslovima upravljanja ZP.

Planiramo izraditi i donijeti sljedeće dokumente :

###### **- Pravilnik o unutarnjem redu u Zaštićenom pejzažu KONJUH,**

Njime će se propisati svi modeli zaštite, od očuvanja, posjećivanja i korištenja svih vrijednosti unutar prostora ZP, kao i visine sudskih i mandatnih kazni ( kazne na licu mjesta), za njegovo nepoštivanje i narušavanje.

Iz Pravilnika o unutarnjem redu će proizaći i drugi pravilnici, kojim će se urediti različita pitanja vezana za upravljanje ZP. Pravilnik o unutarnjem redu može se smatrati osnovnim "alatom" za rad i funkcionisanje JU na poslovima zaštite i nadzora u Zaštićenom pejzažu.

###### **- Pravilnik o posjećivanju i kretanju u prostoru ZP,**

###### **- Pravilnik o načinu vršenja službe Nazornika u ZP,**

###### **- Pravilnik o obavljanju rekreativnih, zabavnih i edukativnih aktivnosti u ZP.**

###### **- Pravilnik o saobraćaju u ZP,**

###### **- Pravilnik o komunalnom redu, i upravljanju otpadom u ZP,**

###### **- Prvilnik o naknadama, ekološkim taksama i cjenama usluga u ZP.**

U skladu sa mogućnostima i potrebama, Ustanova će takođe izraditi i donijeti i druge potrebne akte, koji će regulisati oblasti zaštite od požara, zaštite na radu, finansijskog poslovanja, knjigovodstva i drugo.

**Rok za provođenje planiranih aktivnosti 2014. godina**

### **1.3. Dopuna djelatnosti – doregistracija JU**

JU Zaštićeni pejzaž "Konjuh" Banovići, osnovana je Zakonom, kojim je u članu 7. određena djelatnost ustanove. Na osnovu toga je izvršena registracija kod nadležnog Suda. Određivanje djelatnosti nije riješeno na najzahvalniji način, odnosno ograničava rad Ustanove na poslovima upravljanja ZP u duhu samo održivog načina upravljanja vrijednostima ZP KONJUH.

U tom smislu u saradnji sa nadležnim Ministarstvom planiramo provođenje aktivnosti na doregistraciji Ustanove u pravcu registracije novih djelatnosti radi potpunijeg rada JU na povjerenim poslovima upravljanja ZP.

**Rok za provođenje april 2014. godine**

## **2. PLAN NABAVKE OSNOVNIH SREDSTAVA**

JU Zaštićeni pejzaž "Konjuh" Banovići, nema u svom vlasništvu objekte u vidu zgrada ili drugih objekata u svrsi i namjeni upravljanja vrijednostima ZP, niti pomoćnih objekata ili građevina navedene namjene.

Takođe ustanova ne posjeduje nikakva osnovna sredstva za prevoz, sredstva za rad, kao i drugu pokretnu i ne pokretnu imovinu, niti bilo kakva stečena prava u smislu vlasništva.

Zbog toga JU u 2014. godini planira nabavke i gradnje određenih osnovnih sredstava u skladu sa finansijskim mogućnostima.

### **2.1. Aktivnosti oko nabavke zgrada**

U planskoj godini, JU će pokrenuti određene aktivnosti preko Ministarstva prostornog uređenja i zaštite okoliša TK, nadležnog za rad Ustanove, oko kupovine određenih objekata i zgrada u svrhu upravljanja prostorom i vrijednostima ZP. U tom pravcu su postavljene određene smjernice i dogovori oko kupovine zgrada unutar prostora ZP koje su u vlasništvu drugih subjekata, a nemaju stvarnu i stalnu namjenu, koje bi se mogli privesti u namjenu upravljanja ZP, odnosno bile bi vlasništvo JU.

**Rok za realizaciju 2014. godina.**

### **2.2. Preuzimanje objekta Adrenalinski park ZLAĆA**

Ustanova u 2014. godini, po realizaciji projekta "Adrenalinski park Zlaća" Ugovorom će preuzeti objekat u vlasništvo i regulisat ostala pitanja sa UG FUTURIST, ugovorne strane kao realizatora projekta, oko korisničkih prava i rada objekta.

**Rok za realizaciju april 2014. godine.**

### **2.3. Nabavka prevoznih sredstava i opreme**

U 2014. godini ustanova planira nabavke osnovnih sredstava, prevoznih sredstava i opreme, u svrhu rada na upravljanju ZP u skladu sa Planom nabavki JU za 2014. godinu.

Određena osnovna sredstva bit će u funkciji ostvarivanja prihoda Ustanove na način iznajmljivanja i korištenja tih sredstava od strane posjetitelja, čime se ujedno podiže sadržajnost i kvalitet ponude Zaštićenog pejzaža.

**Rok za realizaciju april 2014. godine.**

### 3. PLAN IZGRADNJE I UREĐENJA PODRUČJA

U skladu sa materijalnim mogućnostima, Ustanova planira pokretanje i realizaciju više projekata čije finansiranje je obezbjeđeno iz javnih fondova i sredstava Ustanove.

#### 3.1. Realizacija Projekata inventarizacije, uređenja, zaštite i promocije vrijednosti Zaštićenog pejzaža KONJUH

Ustanova je sredinom 2013. godine izradila **Projekat inventarizacije, uređenja, zaštite i promocije vrijednosti Zaštićenog pejzaža KONJUH**, koji je apliciran na Javni poziv Strategija zaštite okoliša za 2013. godinu "Lokalne inicijative za zaštitu biodiverziteta u zaštićenim područjima", korištenje javnih sredstava za poboljšanje uslova upravljanja zaštićenim područjima u F BiH.

**Projekat je pozitivno ocijenjen, a odobrena su sredstva u iznosu od 67000 KM. Za realizaciju projekta predviđena su vlastita sredstva Ustanove od 15000 KM.**

**Projekat ima za cilj:**

- **Izvršiti registraciju i klasifikaciju** svih tipova prirodnih, kulturno historijskih i izgrađenih vrijednosti ZP „Konjuh“.
- **Identificirati strukturna obilježja pejzaža koja predstavljaju njegove vrijednosti**, na osnovu zakonitosti njihova oblikovanja i funkcionisanja, te dati procjenu njihovog sadašnjeg stanja.
- **Izvršiti kategorizaciju vrijednosti** područja prema utvrđenim standardima, od strane stručnjaka i od strane javnosti.
- **Propisati mjere za njihovu zaštitu, očuvanje i unapređenje.**
- Sistematizirati sve dobivane podatke u bazu podataka i izraditi **Registar vrijednosti područja ZP.**
- Maksimalno afirmirati sve kategorije prirodnog, kulturno historijskog i izgrađenog nasljeđa, kao objekte ili pojedinačne vrijednosti.
- **Uređenje lokaliteta** sa vrijednostima i staništima na kojima se nalaze ili obitavaju vrijednosti ZP.
- **Prezentaciju** svih vrijednosti posjetiteljima putem informativnih centara i izdavanjem štampanih i video materijala.
- **Promociju** Zaštićenog pejzaža u cilju stvaranja jedinstvene i prepoznatljive turističke ponude,
- Podsticanje naučne i obrazovne aktivnosti koje će doprinijeti razumijevanju i jačanju podrške stanovništva o značaju područja.

**Realizacijom projekta izraditi će se:**

1. Elaborat o inventarizaciji, mjerama zaštite i očuvanja vrijednosti ZP KONJUH
2. Registar prirodnih, kulturno historijskih i izgrađenih vrijednosti ZP KONJUH.
3. Baza podataka,
4. Propagandni materijal.

**Realizacijom projekta izgradit će se :**

1. Infrastrukturni objekti u svrhu zaštite, očuvanja, promocije i korištenja vrijednosti područja.
2. Obilježavanje površina i granica lokaliteta ili staništa, vrijednost pejzaža adekvatnim znakovima.
3. Izgradnja potrebnih objekata i sadržaja na lokalitetu postojanja vrijednosti u svrhu zaštite, očuvanja, promocije i korištenja, (table sa informacijama o vrijednosti, prilazni putevi i staze



lokalitetu, zaštitne ograde, putokazi, osnake i drugi potrebni objekti ovisno o tipu zaštićene vrijednosti.

4. Izgradnja informativno edukativnih punktova, koji će pružati informacije o vrijednostima pejzaža Konjuh, gdje će se posjetitelji upoznavati sa vrijednostima područja, imati će i edukativnu svrhu za posjetitelje, prvenstveno za djecu i školsku omladinu, na kojima će se organizirati različiti vidovi edukacije.

Realizacija Projekta izvršiti će se na osnovu Operativnog plana realizacije projekta, kojim će se definisati zadaci i aktivnosti, nositelji realizacije, vrste i obimi radova, cijene, rokovi i drugo.

Po uplati odobrenih sredstava od strane Federalnog ministarstva pristupiti će se njegovoj realizaciji.

**Rokovi realizacije 2014. godina.**

**Vrijednost projekta 82 000 KM.**

### **3.2. Izgradnja ulaznog punkta u Južni dio - sliv Drinjača**

U 2014. godini JU planira vlastitim sredstvima izgraditi ulazni punkt na ulazu u područje ZP, Južni dio-sliv Drinjača, lokalitet izletišta Bebrava i urediti prateće objekte.

Izgradnja ulaznog punkta podrazumijeva izgradnju objekta za smještaj nadroznog osoblja, objekat suvenirnice-biljetarnice, pomoćnih objekata i drugih potrebnih pratećih sadržaja i uređenih površina.

Info punkt podrazumijeva izgradnju panoa područja sa tablama informativnih sadržaja.

Glavni objekat ulaznog punkta je zgrada tipa prizemnog drvenog montažnog objekta od prirodnih materijala, ambijentalno uklopljenog u prostor (drvene oblice, kamen, crijep ili šindra), dimenzija 6x5 metra, za šta će se izraditi posebna izvedbena dokumentacija.

Uz glavnu zgradu, planiramo izgraditi, i kontrolnu kapiju, zaštitnu ogradu i parking prostor potrebnih kapacita,

**Rok realizacije je juli 2014. godine.**

**Procjenjena vrijednost izgradnje i uređenja objekata 15 000 KM.**

### **3.3. Uređenje ulaznog punkta u sjevernom dijelu sliv Zlaća**

Objekat koji je izgrađen kao ulazni - info punkt u okviru realizacije projekata "Uređenje izletišta Zlaća" u 2013.godini, na lokalitetu Zlaća, predviđen za istu namjenu kao gornji, nije potpuno uređen u smislu završetka unutarnjih radova i prostora oko objekta, te ga je potrebno završiti u tom smislu.

**Rok realizacije je maj 2014. godine.**

**Procjenjena vrijednost uređenja objekata i izgradnje pratećih sadržaja 5 000 KM.**

### **3.4. Završetak projekta Adrenalinski park "Zlaća"**

Započeti projekat u saradnji sa Udruženjem građana "FUTURIST" Tuzla, "Adrenalinski park ZLAĆA", koji je urađen u obimu od oko 80% planiranih radova, nastaviti će se i privesti kraju u 2014. godini.

Kako je za realizaciju Projekta potrebno malo posla i kako je izvjesno da UG nije finansijski i pravno sposobno upravljati izgrađenim objektom, Ustanova planira preuzimanje inicijative u

smislu privođenja objekta namjeni i njegovog korištenja. Ugovorom će se definisati prava i obaveze između JU i Udruženja u smislu upravljanja i korištenja parka.

Temelji Ugovora će biti nadležnosti i prava Ustanove i stručno znanje o radu ovakvog objekta sa strane udruženja .

**Rokovi realizacije maj 2014. godine**  
**Potrebna sredstava 5 000 KM.**

### **3.5. Projekat izgradnje i uređenja ulaznih kapija u zaštićeni pejzaž.**

Projekat podrazumijeva izgradnju ulaznih kapija sa potrebnim elementima, ambijentalno uklopljeni i izgrađeni od prirodnih materijala, drvene oblice i kamen, (simbolika ulaznih vrata-kapije, table dobrodošlice, upozorenja, ograničenja, itd.

Ulazne kapije će se izgraditi i urediti na dva lokaliteta, dio sliva Oskove - Zlača i dio sliva Drinjače, u skladu sa Prostornom planu područja.

Na ulazu u ZP sa sjeverne strane u dio Zlača, 2013. godine, već su urađeni određeni poslovi, postavljena ulazna kapija, gdje je potrebno uraditi još neke određene prateće sadržaje.

Na ulazu u prostor ZP u južni dio – Muška voda, ulazna kapija će se izgraditi na ulaznom punktu Bebrava uz ostale objekte, dok ulazna kapija i ulazni punkt u sjevernom dijelu Zlača, nisu na istom mjestu zbog specifičnosti prostora.

**Rok realizacije projekta juli 2014. godine**  
**Procijenjena vrijednost ovih radova je oko 7 000 KM.**

### **3.6. Rekonstrukcije infrastrukturnih objekata**

JU planira u 2014.godini utrošiti određena sredstva za rekonstrukcije i investicijsko održavanje infrastrukturnih objekata u prostoru ZP, za koji se pokaže da je neophodno nužno, samostalno ili u saradnji sadrugim zaduženim i zainteresovanim subjektima.

#### **3.6.2. Rekonstrukcije infrastrukturnih objekata u prostoru ZP**

Takođe JU iz vlastitih sredstava planira izvršiti određene nužne poslova rekonstrukcija infrastrukturnih objekata u prostoru ZP, značajnih ili potrebnih u službi upravljanja vrijednostima Zaštićenog pejzaža, kao što su dionice puteva, mostovi, zaštitni objekti, nužne sanacije na površinama i drugo.

Ovi poslovi realizovat će se nakon izvršenog snimanja stanja i potreba za rekonstrukcionim investicijama objekata u ZP značajnih za poslove upravljanja, po izrađenoj dokumentaciji i u zakonskoj proceduri.

**Rok za realizaciju 2014. godine.**  
**Procijenjena okvirna vrijednost radova je do 12 000 KM.**

#### **3.6.1. Projekat uređenja prostora poslovnog sjedišta JU**

JU za 2014. godinu planira uređenje prostorija i prostora oko zgrade sjedišta Ustanove. To podrazumijeva adaptaciju poslovnih prostorija u smislu rješavanja grijanja, uređenje ulaza i prostora oko zgrade, nadstrešnice iznad ulaza u zgradu, parking prostor, prilazne staze, parka, ograda, kapije i dr.

Poslovne prostorije nemaju riješeno pitanje zagrijavanja, što je veliki problem u toku zime, a prostor oko zgrade sjedišta nikakvo uređenje.

**Rok za realizaciju avgust 2014. godine.**

**Procijenjena okvirna vrijednost radova je do 5 000 KM.**

### **3.7. Projekat postavljanje informativnih panoa, tabli i oznaka u i o ZP KONJUH**

Ovaj Projekat podrazumijeva izradu panoa, tabli upozorenja, obavještanja i oznaka o prostoru zaštite, koji će se izgraditi i postaviti na precizno definisanim mjestima u prostoru ZP i na drugim lokacijama, regionalnim saobraćajnicama, raskrsnicama, drugim mjestima, na području TK u skladu sa Zakonom, sa ciljem davanja informacija o ZP i o JU .

Izgled informativnih panoa i tabli će se standardizirati u skladu sa zahtjevima zaštite prirode od prirodnih materijala uklopljenih u ambijent. O ovome će se donijeti posebna Odluka na osnovu Elaborata o izgledu i sadržaju informativnih objekata.

Ovaj projekat će se realizovati kroz realizaciju projekta inventarizacije vrijednosti ZP, za koji su obezbjeđena sredstva iz javnog fonda za zaštitu prirode i dijelom iz vlastitih sredstava JU, o čemu je već bilo govora.

### **3.8. Izgradnja pomoćnih objekata**

U svom radu Ustanova ima potrebu za objektima u kojima se čuvaju osnovna sredstva i potrebni materijali, garažni – magacinski objekti.

U tom pogledu planira se izgradnja dva garažna objekta, jedan na prostoru u blizini sjedišta JU Grab potok, a drugi na prostoru ulaznog punkta na lokalitetu Bebrava, koji će služiti i kao magacini alata, rezervnih dijelova, goriva i drugih sredstava.

Objekti su od drveta, ambijetalno uklopljeni potrebnih dimenzija koje će se odrediti izvedbenom dokumentacijom.

**Rok za realizaciju septembar 2014. godine.**

**Procijenjena okvirna vrijednost radova je do 10 000 KM.**

## **4. PLAN IZRADE PROJEKATA ZA FINANSIRANJE IZ DRŽAVNIH I DRUGIH FONDOVA**

Uz osnovne radove na upravljanju ZP, Ustanova će stalno i kontinuirano raditi na zaštiti i unapređenju prostora i ponude ZP i u tom cilju pripremati projektnu dokumentaciju, koja će se aplicirati na javne pozive državnih, međunarodnih i drugih institucija za korištenje sredstava i finansiranje projekata u oblasti zaštite i unapređivanje prirode iz namjenskih ili drugih fondova.

### **4.1. Projekat “Izgradnja i uređenje izletišta MUŠKA VODA”**

Ustanova u 2014. godini planira izradu Izvedbeni projekat “Izgradnja i uređenje izletišta Muška voda”, koji će se aplicirati na Javni poziv Strategija zaštite okoliša za 2014. godinu “Lokalne inicijative za zaštitu biodiverziteta u zaštićenim područjima”, korištenje javnih sredstava za poboljšanje uslova upravljanja zaštićenim područjima u F BiH.

Projekat će sadržavati tri dijela, čijom realizacijom će se lokalitet Muška voda, od izletišta Bebrava do izletišta Muška voda, povezati i objediniti u jednu izletničko rekreativnu cjelinu, sa svojim atraktivnim područjima i raznovrsnim sadržajima.

Projekat će sadržavati tri zasebne cjeline:

1. Uređenje izletišta "Bebrava", uređenje površina sa izgradnjom izletničkih objekata i potrebne infrastrukture.

2. Uređenje izletišta "Muška voda", uređenje površina sa izgradnjom izletničkih objekata i potrebne infrastrukture.

3. Rekonstrukcija puta od izletišta Bebrava do hotela Muška voda sa rekonstrukcijom prilaznog puta za Paučko jezero.

## **1.2. Projekat upravljanja otpadom u prostoru ZP "Konjuh".**

Pitanje upravljanja otpadom na području ZP "Konjuh", jedno je od značajnijih, kojem će Ustanova pristupiti sa posebnom pažnjom. U saradnji sa drugim zainteresovanim subjektima i stručnim ustanovama planiramo izraditi određenu dokumentaciju o upravljanju otpadom iz koga će prosteći i konkretna projektna dokumentacija o tom pitanju za čiju realizaciju će se tražiti sredstva u fondovima za zaštitu prirode i okoliša.

## **5. OSTALI PROJEKTI I AKTIVNOSTI JU**

U okviru obavljanja redovnih poslova i zadataka na upravljanju vrijednostima Zaštićenog pejzaža, JU planira provesti i realizovati niz konkretnih projekata u saradnji sa drugim subjektima.

### **5.1. Projekat „Mladi čuvari prirode ”**

U saradnji sa Ministarstvom obrazovanja TK i obrazovnim Ustanovama kantona, planiramo pokrenuti niz aktivnosti koje imaju za cilj stvaranje pozitivnog odnosa i razumijevanju značaja zaštite prirodnih vrijednosti kod školske djece i omladine.

Konkretni projekat je "Mladi čuvari prirode", kome će pored gornjeg cilja biti i cilj osposobljavanje i promovisanje prve generacije mladih čuvara prirode u TK.

Svrha projekta je razvijanje pozitivnog odnosa školske djece u dobi od 10-14 godine prema prirodi i prirodnim vrijednostima, te njihovo pridobivanje za aktivnu brigu i uključivanje u programe zaštite prirode i okoliša, podizanje nivoa individualne i kolektivne ekološke svijesti kod djece i omladine.

Kroz terenske radionice polaznici bi naučili :

- kako promatrati prirodu, kako se spremiti za boravak u prirodi, kako se orijentirati u prirodi,
- pravila ponašanja u prirodi i u zaštićenim područjima,
- upoznati ekološke sisteme i tipovestaništa zaštićenog područja,
- o ulozi i značaju zaštićenih prirodnih vrijednosti ZP,
- povezanost prirode, pejzaža, povijesne i kulturne baštine,
- upoznati neke vrste životinja,
- o ulozi, značaju zaštite i nadzora u ZP, provođenje praktičnih mjera zaštite i nadzora,
- o šumskim zajednicama, vertikalno zoniranje vegetacije, ekološke niše, itd...

Kruna radionica i smisao edukacije je dodjela diploma-certifikata i promocija 1. generacije mladih čuvara prirode TK, čime bi se na svojevrsan način pridružili globalnim snagama, uglavnom mladih ljudi u borbi za zaštitu i očuvanje prirode.

## **5.2. Obilježavanje značajnih datuma vezanih uz zaštitu prirode.**

Obilježavanje značajnih datuma vezanih uz zaštitu prirode, kao i redovni kontakti s medijima provodit će se tokom cijele godine, a u skladu sa financijskim sredstvima koja budu na raspolaganju Javnoj ustanovi.

### **Pored ovih projekata JU planira uraditi i pokrenuti :**

Projekat održavanja postojećih uređenih rekreativnih staza i izletišta ZP.

Projekat uređenja i održavanja zaštitnih pojaseva oko svih izgrađenih dobara na teritoriji ZP

Projekat uništavanja Ambrozije i drugih invazivnih biljnih vrsta na području ZP.

## **IV PROGRAM ZAŠTITE, OČUVANJA, PROMOCIJE I KORIŠTENJA ZAŠTIĆENOG PEJZAŽA KONJUH ZA 2014. GODINU**

### **1. NADZOR I ZAŠTITA**

#### **1.1. Uspostava službe nadzora i zaštite u Zaštićenom pejzažu**

Organizacija službe nadzora i zaštite ZP, zbog njegove prostorne specifičnosti, koja se odražava u tome da je prostor Zaštićenog pejzaža KONJUH, sastavljen iz dvije odvojene cjeline, sliv rijeke Oskove površine od oko 4700 ha i sliv rijeke Drinjače površine od oko 3200 ha, zahtjeva dodatni napor u uspostavi funkcionalne službe nadzora i zaštite.

Služba za nadzor i zaštitu će se organizovati u dva dijela, Južni i Sjeverni, sa kapacitetima po Pravilniku o sistematizaciji radnih mjesta u skladu sa planiranim mogućnostima, koji će se izgrađivati u potrebnom, zasebnom obimu, u svim segmentima od materijalnih do kadrovskih kapaciteta. Na osnovu potreba područja za prisustvom broja nadzornog osoblja, proizašlih iz brojnosti aktivnosti koje obavljaju privredni subjekti i brojnosti posjetitelja područja, nadzorna služba će se prilagođavati i organizirati u funkcionalnu službu.

Pored toga, za kvalitetno funkcionisanje službe nadzora i zaštite u području ZP, potrebno je donijeti što prije Pravilnik o unutarnjem redu, odnosno Plan upravljanja područjem, kojima će se propisati sve mjere zaštite vrijednosti ZP, koji će biti glavni instrument u službi zaštite.

Služba nadzora vršit će nadzor nad uslovima i načinima korištenja prirodnih resursa od strane privrednih subjekata koji vrše privrednu djelatnost na području ZP, korištenja vrijednosti i prostora ZP ostalih pravnih i fizičkih lica, obavljanje rekreacije, posjećivanje, saobraćaj u prostoru, izleti, i svih drugih privrednih, kulturnih, naučnih i ostalih aktivnosti na području ZP.

### **4. OČUVANJE**

#### **4.1. Uspostava sistema očuvanja vrijednosti ZP**

Po izvršenoj inventuri i registraciji prirodnih i drugih vrijednosti ZP, JU će pristupiti izraditi potrebnih funkcionalnih sistema njihovog očuvanja i u tom smislu izraditi potrebne programe.

Programi će se odnositi na sljedeće oblasti:

##### **1. Očuvanje prirodnog nasljeđa:**

- Programi očuvanja biljnih i životinjskih vrsta ZP.
- Programi očuvanja staništa ZP.
- Programi očuvanja ugroženih biljnih i životinjskih vrsta ZP.

- Programi očuvanja pejzažnih vrijednosti ZP.
- Programi očuvanja geoloških i geomorfoloških vrijednosti ZP.
- Programi očuvanja hidroloških vrijednosti i potencijala ZP.

## 2. Očuvanje kulturno historijskog nasljeđa ZP

Za svaki kulturno- historijski objekat ZP, bilo kog nivoa istraženosti i vrednovanja, izraditi će se zasebni programi očuvanja.

## 5. PROMOCIJA

### 5.1. Promocija Zaštićenog pejzaža "Konjuh"

Promociji Zaštićenog pejzaža, bit će posvećena posebna pažnja.

Primarna promocija vršiti će se preko elektronskih i pisanih medija, a prvenstveno interneta, gdje se preko postojeće web stranice, daju sve informacije o prostoru i vrijednostima ZP.

U okviru internet prezentacije, ideja je da se pored osnovnih informacija o vrijednostima i ponudi u ZP, radu i aktivnostima JU na upravljanju ZP, daju i mogućnosti učešća u kreiranju rada Ustanove, kroz sugestije i prijedloge, koje bi mogli predlagati posjetioci, ljubitelji prirode i druge zainteresovane grupe i građani TK.

Promocija ZP vršit će se i drugim sredstvima i direktnim prezentacijama u samom prostoru ZP, posjetama različitim obrazovnim, odgojnim i kulturnim ustanovama i institucijama, kao i učešćem u skupovima koji obilježavaju i promovišu zaštitu prirode.

Štampanje i publikovanje različitih propagandnih, informativnih i stručnih materijala o Zaštićenom pejzažu "Konjuh", također će biti sredstvo promocije, samostalno ili u zajedničkim projektima sa drugim institucijama sličnog interesa.

Pokušat ćemo napraviti prepoznatljive predmete i suvenire sa područja ZP, vršiti promociju sudjelovanjem na sajmovima i sl. događajima, organizovanjem različitih manifestacija u prostoru ZP, umjetničkih kolonija, izložbi, obilježavanjem datuma vezanih za zaštitu prirode i okoliša, organizacija stručnih-školskih ekskurzija, nastava u prirodi, organizacija radionica, seminara, simpozija, kongresa i sl.

Posebno će se posvetiti pažnja saradnji sa svim zainteresovanim subjektima, koju smatramo za najbolji vid promocije prostora ZP i rada JU.

### 5.2. Projekti promocije Zaštićeno pejzaža KONJUH

U 2014. godini JU planira realizovati različite projekte promocije u vidu izdavanja publikacija i drugih promotivnih materijala, pisane i video forme o prirodnim vrijednostima Zaštićenog pejzaža "Konjuh", čiji je cilj pružiti informacije javnosti o vrijednostima ZP, u smislu prostornog položaja područja, raspored vrijednosti u prostoru ZP, njihov opis, vrste biljaka i životinja koje nastanjuju u prostoru ZP, kulturnoistorijske znamenitosti, turističke i pejzažne vrijednosti i druge važne informacije i zanimljivosti, sa mnoštvom fotografija.

Takođe planira se izraditi promo materijal u vidu suvenira, kapa, majica, znački, bedževa i dr. sa znakom i motivima ZP. Realizacijom projekata treba da se privuku posjetioci u što većem broju i da se o pejzažu što dalje čuje.

**Rok za realizaciju 2014. godina.**

**Potrebna sredstva 5 000 KM.**

## **5.3. Saradnja**

### **5.2.1. Saradnja sa državnim institucijama i lokalnim zajednicama**

U svom radu Ustanova će usko sarađivati sa svim institucijama, čiji je interes zaštita i unapređenje prirodnog i kulturno istorijskog nasljeđa TK, kroz sve vidove saradnje i zajedničkog djelovanja.

Prvenstvena i obavezujuća saradnja sa Ministarstvom prostornog uređenja i zaštite okolice TK, će biti osnova, ali su obavezne saradnje i sa drugim Ministarstvima TK i Federacije BiH, po pitanjima zajedničke nadležnosti i od zajedničkog interesa.

Saradnja sa lokalnim zajednicama, općina na čijim teritorijama se prostire ZP, je prioritet, gdje će se težiti uvažavanju svih interesa ovih strana u izradi planova i programskih ciljeva, a u skladu sa interesom zaštite, očuvanja i unapređenja svih vrijednosti ZP.

### **5.2.2. Saradnja sa subjektima koji vrše privrednu djelatnost na području ZP**

Svi subjekti koji vrše neku djelatnost na području Zaštićenog pejzaža, dužni su svoje poslovanje i rad uskladiti sa Zakonom o proglašenju ZP, Zakonom o zaštiti prirode i podzakonskim aktima proizašlim iz ovih Zakona, kao i drugim normama koje služe u svrhu zaštite područja.

Stoga će prilagodba novim, ograničenim načinima korištenja prirodnih resursa biti veliki izazov za sve privredne subjekte, za šta će trebati izvjesno vrijeme u čemu će njihova dobra saradnja sa JU imati veliki značaj u tom cilju.

Pored saradnje u nadzoru nad uslovima i načinima obavljanja djelatnosti, (šumarstvo, ugostiteljstvo, turizam, vodovod, i drugi), saradnja je nužna u cilju zaštite područja od požara, prirodnih nepogoda, krivolova i drugih štetnih faktora i nedozvoljenih aktivnosti, koja će biti uslovljena, kordinirana i često zajenička.

Svi međusobni odnosi Ustanove i strana koje imaju ovlaštenje za rad u ZP, definisati će se na zakonom određenim obavezama.

### **5.2.3. Saradnja sa subjektima koji obavljaju sličnu djelatnost u državi BiH**

Saradnja sa ustanovama i drugim pravnim subjektima koji se bave sličnom djelatnošću u našoj državi, bit će jedna od značajnijih aktivnosti, koje će imati za cilj promociju ZP, a i sticanje novih saznanja i iskustava u poslovima zaštite i očuvanja područja.

Ustanove za upravljanje zaštićenim područjima u našoj državi su malobrojne i uglavnom ne tako duge tradicije u radu, ali svakako sa većim iskustvom od nas.

Prije svih tu je JU za upravljanje zaštićenim područjima kantona Sarajevo u čijem okviru je Zaštićeni pejzaž BIJAMBARE, Spomenik prirode SKAKAVAC i Park prirode VRELO BOSNE.

Saradnjom će pored razmjene iskustava, biti korištene i druge mogućnosti zajedničkog rada na različitim projektima u domeni zaštite prirode.

### **5.2.4. Međunarodna saradnja**

U svom radu Ustanova će težiti i međunarodnoj saradnji sa institucijama istog ili sličnog djelovanja, u užem i širem okruženju. Pored razmjene iskustava i drugih vidova saradnje, promocija Zaštićenog pejzaža "Konjuh", Javne ustanove, Tuzlanskog kantona i države Bosne i Hercegovine u cjelini bit će najvažniji cilj ovakvih odnosa sa stranim partnerima.

Pokazivanje naših vrijednosti u svijetu važna je misija JU.

### **5.2.5. Saradnja sa lokalnim stanovništvom**

Lokalno stanovništvo, koje je svojim svakodnevnim aktivnostima uslovljeno na prostor Zaštićenog pejzaža, neće se lako odreći svojih dosadašnjih navika u ostvarivanju različitih materijalnih benefita i prihvatiti novi režim i namjenu tog prostora.

Ustanova će uvažavati potrebe i zahtjeve te kategorije građana i uvrštavati ih u svoje programske ciljeve i zadatke, ali na osnovi koja ne ugrožava smisao zaštite prirode. U tom smislu Ustanova će stalno raditi na iznalaženju novih načina ostvarivanja koristi u ZP od strane lokalne zajednice, na način trajnog, održivog načina ostvarivanja koristi, na poštivanju ekoloških normi.

Tu su mogućnosti prije svega u promociji seoskog turizma i proizvodnji zdrave hrane, koje će Ustanova maksimalno podupirati i imati sluha za razvoj ovakvih djelatnosti.

Značajna pažnja posvetiti će se edukaciji, upoznavanju lokalnog stanovništva sa normama zaštite prirode i ograničenjima koja se zahtjevaju u odnosu na dosadašnje njihove navike ponašanja prema vrijednostima unutar ZP, kao i objašnjavanje i uvjeravanje u koristi za širu zajednicu od ovakvog zaštićenog područja.

Prezentacija i pojašnjavanje rada JU na poslovima upravljanja ZP lokalnom stanovništvu, posjetiocima ZP, pojedincima i grupama građana, koji imaju interes boravka na prostoru ZP, kao i drugim korisnicima ponude prostora ZP, vršit će se kroz različite programe edukacije i obuke.

Posebno će se posvetiti pažnja kategoriji učenika i omladine, kroz mnoge projekte-škole, naprimjer : Škole u prirodi, mladi čuvar ZP -volonter, Zdrava priroda - zdrav čovjek, ... i mnogo takvih sličnih programa.

### **5.2.6. Saradnja udruženjima i obrazovnim ustanovama**

Način promocije ZP, biti će i saradnja Ustanove sa udruženjima građana koja u svom radu imaju interes zaštite prirode, a posebno s osnovnim i srednjim školama na području TK, sa kojima će se pokušati uvesti praksa zajedničkih nastupa u obilježavanju značajnih datume u zaštiti prirode.

### **5.2.7. Saradnja sa informativnim glasilima i stručnim časopisima**

Način promocije ZP, biti će i saradnja sa informativnim i stručnim glasilima i medijima, preko koji ćemo prezentovati sami sebe i tražiti od njih da nas predstave javnosti u što boljem, ali istinitom svjetlu, koristeći sve mogućnosti i načine prezentacija.

### **5.4. Istraživački projekti i saradnja sa naučnim institucijama**

Rad Javne ustanove na upravljanju ZP, podrazumijeva i naučna istraživanja koja će imati za cilj otkrivanje, stručno i naučno objašnjavanje određenih prirodnih elemenata i pojava, kojima će se doprinijeti obogaćivanju saznanja o vrijednostima Zaštićenog pejzaža i njihovu promociju u širem smislu.

Ovakve projekte pokušati ćemo inicirati u ovoj godini u nekoj od oblasti istraživanja sa eventualnim zainteresovanim institucijama.

Oblasti istraživanja su vrlo velike, jer je poznato da je prostor zaštite veoma bogat u prirodnom i kulturno-historijskom smislu, sa veoma malo izvršenih istraživanja.

Pokušat ćemo pokrenuti neke projekte istraživanja u oblasti:

- Flora



- Fauna
- Gljive
- Staništa i ekosustavi (šume, travnjaci, cretovi, vode, podzemna staništa...)
- Geološka istraživanja, speleologija, hidrogeologija, geomorfologija i dr.
- Kulturna baština.

## **6. KORIŠTENJE**

### **6.1. Razvoj i unapređenje turističke ponude**

Stvaranje uslova za korišćenje Zaštićenog pejzaža u turističko-rekreativnom pogledu, jedna je od osnovnih razvojnih ciljeva Ustanove, kojeg moramo dostići, ako želimo ispuniti našu misiju.

Pored zaštite, očuvanja i unapređenja, korišćenje njegovih prirodnih osobnosti u rekreativnom i turističkom pogledu važna je aktivnost na upravljaju Zaštićenim pejzažom, čiji dobar kvalitet i kapacitet ponude, dat će najveću snagu i doprinos u promociji i stvaranju slike o zaštićenom prostoru i Ustanovi kao upravitelju.

Težit ćemo stvaranju prepoznatljivog Brenda koji se zove Zaštićeni pejzaž KONJUH.

Svi prirodni i izgrađeni objekti i lokaliteti, koji imaju turistički potencijal biti će registrovani, vrednovani i uređenjem prilagođeni namjeni rekreacije u što izvornijem, prirodnijem obliku, sa maksimalnim efektom namjene.

Takođe će na tom planu biti ostvarivana saradnja sa svim drugim subjektima iz sfere turizma na lokalnom i širem nivou.

### **6.2. Privredno korišćenje prirodnih resursa**

Kontrola i nadzor privrednih aktivnosti u prostoru ZP, na korišćenju prirodnih vrijednosti i resursa, od strane ovlaštenih pravnih i fizičkih lica, nadležnost je Ustanove, koju ćemo izvršavati krajnje korektno na principu poštenog odnosa u kome su propisane norme i ograničenja zakonskim i drugim propisima instrument i mjerilo.

Upotrijebiti će se sva sredstva da se korišćenje prirodnih resursa ZP vrši na način koji je u duhu namjene prostora dijela planine Konjuh Zaštićenim pejzažom.

## **7. Kadrovske potrebe JU**

JU u 2014. godini radi sa punim radnim kapacitetima.

Organizacija Ustanove od ukupno 9 radnika, uključujući i direktora i površina od preko 8 000 hektara, kao i okolnost da se radi praktično o dva odvojena prostora zbog njihove saobraćajne nepovezanosti, zahtijeva besprijekoran rad i usklađenost svih elemenata.

Određene nedostatke za random snagom u sezoni poslova i stručnom radnom snagom, Ustanova će pokušat nadomjestiti angažovanjem povremene i stručne radne snage ugovorima o djelu.

Razvojem Ustanove javljati će se potreba za proširivanjem radnih kapaciteta.

### **7.1. Obrazovanje kadrova**

Unapređenje upravljanja ZP, neodvojivo je sa procesom stručnog obrazovanja i osposobljavanja svih zaposlenih JU u oblasti djelatnosti.

Posebno će se posvetiti pažnja minimalno potrebnim startnim znanjima radnika na poslovima nadzora i zaštite ZP za obavljanje svojih dužnosti, koju će izvršiti direktor JU,

kroz organizovanje obuke novo uposlenih radnika.

Praćenje trendova i edukacija u oblasti zaštite prirode i rada ustanova za upravljanje zaštićenim prirodnim područjima, obaveza je za stručne uposlenike i rukovodioce JU.

Kako smo na samom početku, obaveza je svih učenje i sticanje znanja i vještina iz svih oblasti, a posebno oblasti zaštite prirode i rada subjekata koji upravljaju zaštićenim područjima.

## **V SISTEM I IZVORI FINANSIRANJA**

### **1. IZVORI FINANSIRANJA USTANOVE**

#### **1.1 Finansijska sredstva**

Glavni izvor sticanja finansijskih sredstava potrebnih za rad i funkcionisanje Ustanove su sredstva iz budžeta Tuzlanskog kantona, obezbjeđena kroz planirana namjenska sredstva unutar Ministarstva prostornog uređenja i zaštite okoliša TK.

Pored tih sredstava Ustanova planira uspostaviti sistem rada kojim će obezbjeđivati sredstva iz vlastitih izvora, koja očekujemo da budu značajna.

Takođe koristiti će se sve mogućnosti i drugih izvora finansiranja, korištenja javnih sredstava državnih i međunarodnih fondova.

#### **1.2. Obezbeđenje materijalnih uslova za rad JU**

U 2014. godini Ustanova će izvršiti nabavku potrebnih materijalnih sredstava kroz sistem javnih nabavki u skladu sa Planom nabavki za 2014. god. Izvšiti će se nabavka ne nabavljenih osnovnih sredstava potrebnih za rad ustanove u skladu sa odobrenim sredstvima i planovima rada JU.

Težit ćemo nabavci svih potrebnih sredstava koja su nužna u radu, ali na racionalnoj osnovi.

## **VI REZIME**

Godišnjim Planom i programom rada JU na zaštiti, očuvanju, unapređenju, promociji i korištenju ZP KONJUH za 2014. godinu, predviđene su konkretne aktivnosti i zadaci u okvirnom prezentiranju veličina i nosioca aktivnosti, obima radova i rokova, koji će se precizno definisati izradom projektnih i drugih potrebnih dokumenata neposredno prije njihove izrade i realizacije.

Skoro sve izloženo ovim Programom je u okvirima mogućnosti finansijskih kapaciteta izdvojenih za finansiranje rada JU i u okviru su redovnih aktivnosti rada Ustanove.

Provođenje aktivnosti koje su planirane da se izvrše finansiranjem iz namjenskih fondova i drugih izvora, zavisit će od njihovog kapaciteta i mogućnosti, kao i naše spremnosti za ispunjanje uslova njihovog korištenja.

**Ustanova se nada da će uz punu podršku državnih institucija i lokalnih zajednica, a koje također mogu ostvariti svoje interese kroz produktivan rad Ustanove, ispuniti predviđeni plan, što će u suprotnom biti težak zadatak.**

**DIREKTOR JU :**

Modrić Enes, dipl.ing.

**PREDSJEDNIK UPRAVNOG ODBORA**

mr. sci. Enes Šišić, dipl. ing.